

clefasticis edita, tum recusa a Ruinaro, & denique in Actis San-
 ctorum a Cl. P. Guilielmo Cupero, continuatore Bollandi ad diem
 17. Julii illustrata. Gloriosi illi Martyres in agone dicebant: *Deo*
gratias conferimus, qui dignatur nos HODIE Martyres ACCIPERE IN
COELIS pro confessione sua. Sive, ut in aliis Actis legitur: *Hodie Mar-*
tyres in Caelo sumus. Sic venientes ad locum martyrii, gladio beatas Deo
Animas tradiderunt. Dominus vero Jesus Christus suscepit Martyres suos in
Pace. Neque minus præclara, immo longe præclariora sunt, quæ
 de Martyribus in Deciana persecutione Anno Christi ccc. ad æternam
 Vitam translatis, scripsit S. *Dionysius Alexandrinus Episcopus*, omnium,
 qui suo tempore floruerint, celeberrimus & doctissimus in Ecclesia
 Catholica Antistes & Scriptor. Quæ tunc contingere sub oculis suis,
 perferpsit ille ad Fabium, sive Fabianum Episcopum Antiochenum;
 ejusque Epistolam servavit nobis Eusebius Cæsariensis Lib. vi. cap. 41.
 & 42. Histor. Ecclesiast. En quid S. Vir post tantæ laniæ narratio-
 nem in calce ejusdem Epistolæ subjungit: *Ceterum. inquit, hi di-*
viini Martyres, QUI NUNC ASSESSORES SUNT CHRISTI, & RE-
GNI illius CONSORTES, ac judicii participes, una cum ipso judicaturi,
dum heic apud nos essent, quædam e Fratribus lapsos, et idolis sacrificasse
convictos susceperunt. Accedat nunc Burnetus, & Justorum veterum
Animas hinc emigrantes arceat a Caelo, atque ad miserimum quasi
soporem eas damnet, nondum a tot Sæculis excitatas, neque post
complura Sæcula excitandas, ac dubia hac de re, aut inconsulta
quorundam antiquorum dogmata præterdat. Aliam plane tunc fuisse
mentem Catholicæ Ecclesiæ, quæ jam attulimus, satis prodidere.
 Luculentissime vero eadem confirmata heic habemus ab insigni Re-
 ligionis Christianæ Scriptore Dionysio Alexandrino, cui nullum e
 suis pugilibus (quod est ad rectum de rebus Theologicis judicium)
 Burnetus æquet, & cui non immerito antiquitas Magni cognomen-
 tum detulit. Quanquam & per se quisque facile dignoscat, non
 aliam quam istam potuisse tunc regnare in Catholica Ecclesia doctri-
 nam. Si tunc Burnetus quispiam vixisset, suamque de statu Mortuorum
 opinionem disseminans Fidelibus persuasisset: quis amabo, ad mortem
 pro Christo oppetendam ruisset, immo quis non ab ea fuisset abster-
 ritus? Non alia de causa tam intrepidi ibant, tam alacres festina-
 bant ad supplicia milites Christi, ipsæque tenellæ Virgines, nisi
 quia commune Sanctæ Religionis dogma erat, confessum post glo-
 riosum agonem Animas ad Coronam, ad Dominum, atque in Cæ-
 los migrare, ubi Beatitate ac Visione Dei fruereutur. Hujusce do-
 ctrinæ certos nos facit magnam Ecclesiæ lumen Sæculo Christianæ
 Aetatis 111. prælaudatus *Dionysius Alexandrinus*. Atque hinc etiam hau-
 rimus, non aliter Ecclesiam, quam nos supra, fuisse interpretatam
 Apostoli verba, cupientis *dissolvi et esse cum Christo, sive peregrinari a*
Corpore, et præsentem esse ad Dominum; uti & alia Apocalypseos, &
 Evangelistarum atque Apostolorum verba, quæ supra delibavimus,